



Nuuk 21. Marts 2012

Inatsisartut suleriaasianni § 37 naapertorlugu matumuuna Naalakkersuisunut ukuninga apeqquateqaateqarpunga:

(Olga P. Berthelsen, Inuit Ataqatigiit)

1. Nuup avataani inigisaminnit anisitaasimasut, qanoq sumullu aammalu qanoq atugassaqaartinneqarlutik inisseqqinneqarallartarpat?
2. Assersuutigalugu Qeqqata Kommuuniani, 68-t anisitaasimasut inissinneqarallartarpat, imaluunniit angerlarsimaffeqanngitsutut inuuneqalerpat? Qaassuitsup Kommuuniani 18-t, Kommuuni Kujallermi 33-t Sermersuullu Kommuuniani 7-t?
3. Sooq-una assersuutigalugu Qeqqata Kommuuniani, anisitaasimasut 68-isut illusitseqqiffissamik atorfissaqaartitsinngitsut? Nuummi 7-t (2011) atorfissaqaartitsisut?
4. Angerlarsimaffeqanngitsut pillugit mississuinerit, qanoq ingerlappat aammalu sumut killippat?
5. 2010 aammalu 2011-mi sinerissami, inigisaminnit anisinneqartut katillugit 283-sut, taakkunanit qassit inuit ataasiakkaajuppat? Aammalu qassit inoqutigikkuutaajuppat?
6. Innuttaasut akiliisinnaassuseqaraluartut inuttulli ajornartorsiuteqarnertik peqqutigalugu, inigisaminnit anisitaasartut ikiorserniarneqartarnerat, qanoq isumaginninnikkut malinnaaffigineqartigaa?

Tunngavilersuut:

Nuup avataani inigisaminnit anisinneqarsimasut, nuummi anisinneqarsimasunit amerlanerujussuupput. Taamaakkaluartorli illusitseqqiffissanik pilersitsisoqarnissaa pisariaqaartinneqanngitsoq oqaatigineqarpoq. Taanna paasisinnaannginnakku itinerusumik nassuarneqassasoq kissaatigaara.

Maanna piffisami sivitsulersumi, angerlarsimaffeqanngitsut pillugit misissuinerit ingerlanneqarput. Suliap taassumap qanoq ingerlanera paaserusunnarpoq, maannamut inissaaleqisut aammalu anisitaasimasut, misissuinerit ilaatinneqarnersut paaserusunnarmat.

2010-p aammalu 2011-p ingerlanerani, nunatsinni anisitaasimasut 283-siupput. Paaserusunnarpoq inuit ataasiakkaat tassani pineqarnersut, imaluunniit inoqutigiiikkuttaajunersut (ilaqutariit). Ilaqutariit tassani pineqarsimassappata, assilissap maanna takutinneqarneranit, nunatsinni annertunerujussuarmik anisitaasimanermik eqqugaasimasut amerlanerusimassammata.

Akissuteqaammi oqaatigineqarpoq ikiorserneqartartut tassaasut, isumaginninnermut inatsit tunngavigalugu, ikiorneqarnissamik pisinnaatitaaffeqartut. Anisitaasimagaanni ikiorneqarnissamillu isumaginninnermut inatsit naapertorlugu pisinnaatitaaffeqanngikkaanni, inuttut atukkat qanoq malinnaavigineqartarnersut paaserusukkakku, apeqqut taanna apeqqutigivara.